

سلسلة مبادئ في الحياة الروحية

سمات الإنسان المسيحى
(١) قديس مش خاطئ

إعداد

بيت محبة الله

اسم الكتاب : سلسلة مبادئ في الحياة الروحية.
إعداد: خدام بيت محبة الله للطلبة للمغتربين.

الطبعة: الأولى ٢٠١٦

رقم الإيداع: ٢٠١٦/٧٤٥٥

الترقيم الدولي: I.S.B.N ٩٧٨-٩٧٧-٩٠٣-٨٥٩-٩

* لنا رجاء في المسيح ان تصل هذه
السلسلة إلى يد كل شاب مسيحي بأقل
تكلفة.

*يمكنك ان تشاركنا هذا الرجاء بإهداءها
لأصدقاءك واحباءك.

ملاحظة: هذه السلسلة (مبادئ الحياة الروحية للأسرة) تعتبر
تكملة لمبادئ الحياة الروحية فللاستفادة الكاملة رجاء قراءة الأجزاء
الأساسية أولاً بالترتيب فعدم الترتيب قد يسبب تشويش وعدم
الاستمرار قد يسبب إحباط.



قداسة البابا تواضروس الثاني

بابا الإسكندرية وبطريك الكرازة المرقسية (١١٨)

تفہم

فجأة وأنا في طريقى للقاء أبي الروحى وجدت صوت يشبه
الهمس في أذنى ويقول لى "أنت رايح فين!!"

- رايح عند أبي الروحى!!

- مش مكسوف من نفسك!! شوف لىك شهور طويلة بتيجى
ولسه بتسقط في الخطية!!

- أنا فعلا بأسقط في الخطية بس أنا رافضها وبجاهد ضدها!!

- رافضها!! لا مش رافضها!! أنت نجس!! أنت خاطئ
وهاتفصل خاطئ!!

-يعنى تقصد إيه!!

- يعنى ريح دماغك. بلا حياة روحية ولا بتاع!! أنت شاب
عيش شبابك والكل خطاة وجهنم مستنياكم كلكم!!

وفي لحظة انتبهت لنفسى وعرفت إنهما أفكار شيطانية هدفها
تدميرى!! يارب يسوع أعنى!! يارب يسوع اعنى!!

وصلت لأبى وقلت: سلام يا أبى.

قال: سلام والنعمة يا ابنى. حمد لله على سلامتك.

قلت: الله يسلمك يا أبى.

قال: إيه أخبارك يا ابني!؟

قلت: أشكر ربنا يا أبي. بس وأنا جاي النهاردة الأفكار الشيطانية كانت بتحاربني وتقول لي "طالما بتقع في الخطية يبقى خاطئ. وحتى لو توبت بتخطئ تاني يبقى خليك خاطئ وفي النهاية ضيع مع الضايعين. أفكار صعبة قوى يا أبي مش عارف أعمل إيه!!
قال: دى حرب اسمها الحرب النفسية بيستخدموها في الحروب، وبيها العدو بيحاول يوصل للخصم بتاعه إنه أقوى منه علشان حالته المعنوية تضعف فينهزم بسهولة. واللى يصدق كذب العدو يتهزم قبل ما يبدأ الحرب. وزى كذا إبليس بيعجى هو والشياطين بتاعته ويقولنا "إنتو ضعفاء-إنتوا انجاس- إنتو مش تقدرروا على إبليس- هاتروح جهنم-خطايكم مش مغفورة".

فأخطر حرب لينا مع إبليس هي حرب الذهن، ولو نجح إبليس أنه يتحكم في أذهاننا فسهولة هاتحكم في سلوكنا، لكن لو إحنا إنتصارنا عليه في الحرب دى مش هابقدر علينا ابدًا. ولنتخيل حوار الشياطين علشان يجاربونا:

شيطان كبير: يا أنجاس!! انتباه!!

شيطان ١ و ٢: أمرك يا كبير الانجاس!!

شيطان كبير: ركزوا معايا يا انجاس!! النهاردة هاأقولكم على
حربنا الخطيرة مع البشر!!

شيطان ٢: إيه هي يا كبير الانجاس!!

شيطان كبير: حربنا الأولى هي حرب الذهن.

شيطان ١: يعنى إيه حرب الذهن يا كبير الانجاس!!

الشيطان الكبير: يعنى حرب الدماغ!! يعنى حرب الفكر!! فلو

اتحكمتنا في أفكاره بسهولة نتحكم في أفعاله ونخليه عبيد لنا!!!!

فهمت يا نجس!!

شيطان ٢: ولو ما كسبناهاش!!!!

الشيطان الكبير: لو مكسبناهاش يا نجس. مش هانقدر نتحكم

فيهم وهم اللي هايغلبونا ويسحقونا!! فضرورى تشدوا حيلكم.

دى أول وأهم حرب لنا مع البشر يا أنجاس!!

شيطان ٢: طيب إزاي هانبدأ معاهم حرب الذهن دى يا كبير

الانجاس!!

الشيطان الكبير: نخليهم يصدقوا كلام صغر النفس والإحباط

عن نفسهم، فكل ما يحتقروا نفسهم هاييقوا ضعفاء وبكدا هانعرف

نتحكم فيهم!!

شيطان ١: طيب ولو ما صدقوش نعمل إيه!!
الشيطان الكبير: خليك متفائل يا نجس!! لو مصدقوش تقولوا
لهم إن دا إتضاع!! وضرورى يكونوا متضعين!! مفهوم!!
شيطان ١ و ٢: مفهوم يا كبير الانجاس!! مفهوم يا كبير الانجاس!!
قال: فيابليس هايحاول بكل إمكانياته إنه يجبطنا، لكن الله
بيشجعنا وبيطلب مننا إننا نشجع نفسنا فمكتوب " ليقبل الضعيف
بطل أنا" (يو ٤ : ١٠). يعنى الشخص الضعيف يشجع نفسه ويقول
أنا بطل.

وخذ بالك يا ابني، إن **التشجيع وصية كتابية**. فدا
مش مجرد اقترح منى ولا مجرد كلمة!! دا وصية من
الله. الله بيقول "الضعيف يقول أنا بطل". يعنى كل
شخص ضعيف الله بيقول له تشجع وقول أنا بطل،
واللى مش هايعمل كدا هو بيكسر وصية في الكتاب
المقدس!!

والنهارة هانتكلم عن سمات أو صفات المسيحي الحقيقي.
فاللى عنده الصفات دى هو المسيحي الحقيقي، واللى مش عنده

هو مسيحي غلبان مش عارف إمكانياته، وأول صفة للمسيحي
الحقيقي هي انه

قديس مش خاطئ.

قلت: تقصد إيه بكلمة قديس مش خاطئ!! قدسك عاوز تقول
إني لو أنا مسيحي يبقى أنا قديس وبلا خطية!!
قال: إحنا يمكن ناقشنا الجزئية دي قبل كدا يا ابني، لكن
النهاردة هانأخذها بتفصيل أكثر. فاصبر معايا وهاتعرف المعنى
الحقيقي لكلمة قديس من الكتاب المقدس وفي النهاية هأقول لك
مفاجأة مفرحة.

قلت: دايما يا أبونا تفاجئني بالجديد. لكن إيه إثباتاتك يا أبي
إني قديس!!؟

قال: الإثبات الأول. نبدأه بسؤال. هل أنت ابن الله أم لا؟!
قلت: طبعاً ابن الله. فأنا كل يوم بأصلي وأقول "أبانا الذي في
السموات".

قال: رائع. هأثبت لك أن كلمة ابن الله أهم وأعمق وأقوى
من كلمة قديس.
قلت: تمام يا أبونا.

قال: لو أب عظيم يكون ابنه؟!

قلت: عظيم:

قال: ولو أب غنى يكون ابنه؟!

قلت: أكيد غنى.

قال: ولو أب قدوس يكون ابنه!!

قلت: قدوس.

قال: تمام. ولأنك ابن لله القدوس فالطبعي تكون قديس. ودا

مكتوب في رسالة بطرس الرسول الأولى "لأنه مكتوب كونوا

قديسين لأني أنا قدوس" (١ : ١٦).

كما أن كلمة ابن أهم وأعمق من كلمة قديس. فالقداسة صفة

واحدة من صفات الله أبونا، لكن كلمة ابن تعنى أن كل ما هو لله

أبوك من صفات هو ليك. زى القداسة والبر والحرية. فمكتوب

"الإنسان الجديد المخلوق بحسب الله في البر وقداسة الحق" (اف ٤ :

٢٤)

فإحنا أبناء لله ولينا صفات الله من القداسة

والبر، فاللى يصدق إن ابن الله ضرورى يصدق إن

ليه صفات الله مش ليه صفات إبليس.

قلت: تمام يا أبى كدا إقتنعت. لكن إيه هو الإثبات التانى؟
قال: الإثبات التانى موجود في ١ كو ٣: ١٦. بولس الرسول
يقول "أما تعلمون أنكم هيكل الله وروح الله يسكن فيكم"
فهل أنت فيك روح الله القدوس ولا لا؟!
قلت: طبعا فيّ روح الله. فأنا اتعمدت واتمسحت بالميرون
المقدس.

قال: تمام وهل روح الله القدوس لما يسكن في مكان يقده
ولا ايسيه نجس؟!
قلت: أكيد يقده.

قال: فاللى مش هايؤمن إنه قديس ومقدس بسكنى روح الله
فيه، دا كأنه يقول "أنا فيّ روح نجس" فهل تحب أن يسكنك روح
الله القدوس ويقدهك ولا تكون نجس ويسكنك روح نجس.
قلت: لا طبعا. روح نجس!! ربنا يحميننا!!
قال:

فيا تصدق وتؤمن إنك قديس وبيسكن فيك
روح الله القدوس. أو تكون نجس وبيسكن فيك
روح نجس!!

قلت: الصراحة يا أبى كلام في منتهى الخطورة ضرورى كل شخص مسيحي يعرفه. لكن إيه هو الإثبات الثالث؟!

قال: الإثبات الثالث موجود في رسالة بولس الرسول لأهل غلاطية "لأن كلكم الذين اعتمدتم بالمسيح قد لبستم المسيح" (٣):

(٢٧)

يعنى كل اللى اعتمد باسم المسيح أخذ صورة المسيح. والمسيح قدوس وإحنا صورته علشان كدا إحنا قديسين. واللى مش هايصدق كدا هو بكدا مش بيلبس المسيح لكن هايلبسه روح نجس، فاختار يا إما تلبس صورة المسيح وتكون قديس أو أنك تكون نجس ويلبسك روح نجس!!

قلت: الموضوع مش محتاج إختيار يا أبى. الموضوع خطر. لكن ليه فيه ناس كتير مش مصدقين إهم قديسين!!!

قال: فيه ثلاثة أسباب بتخلى الناس ما يصدقوش إهم قديسين:

أول سبب هو حروب الشياطين.

فزى ما قلنا الشيطان بيركز كل حربه على الذهن. لأنه لو نجح أنه يتحكم فى أذهاننا فبسهولة هايتحكم فى سلوكنا. وهنا الشياطين هايخططوا ويقولوا

شيطان كبير: تعالوا يا انجاس علشان نبدأ حرب الذهن مع
البشر!!

شيطان ٢: إزاي هانبدأ معاهم يا كبير الانجاس!!
الشيطان الكبير: تركيزنا الأول مش إننا نحاربهم بأى خطية أو
بأى نجاسة!!

شيطان ١: إزاي!! لو ماركزناش على الخطية والنجاسة هانركز
على إيه!!

الشيطان الكبير: افهم يا نجس. لو حاربناهم بالخطايا والنجاسة
وتابوا يبقى ما عملناش حاجة، لكن في البداية نغير أفكارهم عن
نفسهم. ونخليهم يصدقوا إن هم كدا كدا أنجاس، ولو صدقوا كدا
هايقوا تبع مملكتنا، مملكة الأنجاس وبيقوا عبيد لينا.

شيطان ٢: وكدا نتحكم فيهم ونذل فيهم زى ما إحنا عاوزين!!
شيطان ١: بس دا هم قديسين علشان هم متعمدين ومسوحين
بالميرون إزاي ييقوا أنجاس!! دا إحنا اللي انجاس!!

الشيطان الكبير: أنت معنا ولا معاهم يا نجس!! لازم نخدعهم
ونكذب عليهم. فاهمين!!

شيطان ٢ وشيطان ١: لازم نخدعهم ونكذب عليهم!! فاهمين فاهمين. يا كبير الانجاس!!

الشيطان الكبير: يلا وريني همتكم يا أنجاس!! لفوا حوالين دماغ كل واحد فيهم. أهم حاجة الدماغ. لفوا حواليه لحد ما يصدق إنه نجس بجد!!

قال: فلو نجح الشيطان إنه يقنعنا إننا مش قديسين وإننا خطاة وأنجاس فبسهولة هايسقطنا في كل خطية وكل نجاسة. فمكتوب "لأنه كما شعر في نفسه هكذا هو" (ام٢٣: ٧)

فلما الواحد يصدق إنه نجس وخاطئ كدا لما يعمل الخطية ويسقط في النجاسة مش هايستغرب ولا هايفكر في التوبة، لكن هايتعاش مع النجاسة والخطية ويحس إنها طبيعته. زى ما يقول المثل "وإن طلع العيب من أهل العيب. مايقاش عيب".

علشان كدا شباب كثير للأسف صدقوا كذب إبليس فيأسوا من نفسهم واستسلموا للخطية والنجاسة. فتغيير السلوك بيكون نتيجة طبيعية لتغيير الذهن مش العكس، فعلشان حد يتغير سلوكه ضرورى يتغير ذهنه في الأول، علشان كدا بولس الرسول قال "تغيروا عن شكلكم بتجديد أذهانكم" (رو ١٢: ٢).

ولأن إبليس في منتهى الدهاء فيبدأ من المكان الصح، فيحاول
 يبرمج أذهنا إننا خطاة وطبيعتنا الخطية، فلو نجح في كذا هانكون
 لعبة بين يديه وهاتحكم فينا. يقول القديس مار اسحق السرياني
 "كل اهتمام الشيطان ينحصر في هذا الأمر أن يُقنع الإنسان أنه
 ليس لله عناية به".

فخذ بالك من أفكارك يا ابني لحسن
 إبليس يتحكم فيك ويذلّك، فالصوت
 اللى يقولك إنت طبيعتك النجاسة مش
 القداسة، اعرف إنه صوت إبليس أو حد
 مخدوع من إبليس ويعمل معاه من غير
 ما يدري!!

يعرف الشيطان أن المدخل
 الحقيقى للسماء أو جهنم هو
 الفكر، بالفكر نتذكر الله،
 فنكون محفوظين فى
 حصنه، وبالفكر نجول فى
 محبة العالم، والتلذذ
 بالشهوات فتفتح النفس
 على جحيم الخطايا
 والرجسات.

ق. مار اسحق السريانى.
 (الشيطان ونصرتنا عليه)
 ص ٨٠. للقص تادرس
 يعقوب ملطى)

قلت: "الصوت اللى يقول لى أنى
 طبيعتى النجاسة مش القداسة يبقى دا
 صوت إبليس". لكن إزاي نقاوم الحرب
 الشيطانية دى. الصراحة للأسف فيه
 ناس كثير واقعين فيها؟

قال: تقاوم حرب إبليس بكلمة الله، فدا أقوى سلاح. ردّ على إبليس بكلمة الله زى ما عمل الرب يسوع على الجبل، ما تتفاوضش مع أفكار إبليس ابدأ. لأنّ المفاوضات معاه هاتنتهى بسقوطك.

قلت: وإزاي أرد عليه بكلمة الله يا أبونا ممكن تديني مثال عملي!!

قال: يعنى لما ييجى إبليس يحاربك ويقول لك: "أنت نجس علشان أنت بتقع في خطايا كثير!! خطايا كثير قوى!! كل يوم بتقع في العادات والأفلام القبيحة. علشان كذا انت نجس. نجس.

رد عليه وقول له.

- "لا أنا مش نجس، أنت اللي نجس يا إبليس . أنا هاتوب ومكتوب أن دم المسيح هايطهرني من كل خطية".
- "حتى لو توبت هاتقع تاني. هاتروح مني فين هاوقعك هاوقعك!!

- "حتى لو سقطت هاقوم تاني وتالت حتى ولو مليون مرة يا إبليس يا نجس. مكتوب "لا. لا تشمتي بي يا عدوتي".

ولو فيه شابة الشيطان بيحاربها ويقولها

- "طيب وأنتي يا بنت يا نجسة. الماضى بتاعك صعب هاتعملى فيه إيه!! أنت عملتى خطايا كتير قوى!!
ضرورى ترد عليه وتقول له:

- أنا توبت عن كل خطية. توبت وخطاياى كلها مغفورة.
دم المسيح غفر لى كل خطية. وأنا مقدسة بدم المسيح وأنت اللى
نجس يا إبليس.

- "طيب فيه خطايا نسييتها!! وفيه اللى اتكسفتى تقوليها!! دا
كله بيخليك نجسة. نجسة وتبع مملكة الانجاس.

- أنا مقدسة لأنى توبت والمسيح غفر لى كل خطية اللى نسييتها
واللى اتكسفت اقولها. كله كله مغفور. خطاياى كلها مغفورة.
وانا مش نجسة أنت اللى نجس يا إبليس. أنت اللى نجس يا إبليس.
مكتوب "محوت كغيم ذنوبك. كسحابة خطاياك. ارجع إلىّ لأنى
فديتك"

قلت: تمام كدا كل ما ييجى يحاربنى هاستخدم كلمة الله. لكن
إيه الحاجة الثانية اللى بتخلينا مانصدقش إننا قديسين.
قال: تانى حاجة بتخلينا مانصدقش إننا قديسين هو:

المفهوم الخاطئ عن القداسة.

فكثير مننا يفتكروا إن القداسة هي إننا نعمل المعجزات ونشفى المرضى ونخرج الشياطين.

قلت: وهو القداسة حاجة غير كدا يا ابونا؟! فكل الناس عارفة إن هي دى القداسة!!

قال: إخراج الشياطين وشفاء المرضى وعمل المعجزات دى مواهب، أداها الله لبعض الناس علشان يخدموا بها باقى إخوتهم. فكل عضو فى الجسد ليه موهبة خاصة يخدم بها باقى الجسد. مكتوب "لأنه كما أن الجسد هو واحد وله أعضاء كثيرة وكل أعضاء الجسد الواحد اذا كانت كثيرة هي جسد واحد كذلك المسيح أيضا. (١ كو ١٢ : ١٢)"

دا كمان ممكن يا ابنى حد يكون عنده مواهب زى كدا ويهلك!!

قلت (باستغراب): معقولة يا أبونا!! شخص بيخرج شياطين ويشفى مرضى وفى النهاية يهلك!!

قال: دا مش كلامى يا ابنى لكنه كلام الرب يسوع نفسه. فهو قال فى (مت ٧ : ٢٢). "كثيرون سيقولون لى فى ذلك اليوم يا رب

يا رب أليس باسمك تبأنا وباسمك أخرجنا شياطين وباسمك صنعنا
قوات كثيرة. فحينئذ أصرح لهم أني لم أعرفكم قط اذهبوا عني يا
فاعلي الإثم."

قلت: بس إزاي يا أبونا دا يحصل!! شخص يخرج شياطين
ويتنبأ ويعمل قوات كثير وفي النهاية يكون مع فاعلي الإثم!!
قال:..زى ما قلنا دي مواهب الله إدها لبعض الناس علشان
يخدموا باقى إخوتهم. لكن من الممكن أنهم يستخدموها لمجد
أنفسهم أو لجمع المال أو علشان يتسلطوا بيها على الناس، ويتاحروا
بالمواهب اللي ربنا عطاه لهم. زى ما هو مكتوب عنهم في (1 تي
٦ : ٥) "أناس فاسدي الذهن وعادمي الحق يظنون أن التقوى
تجارة تجنب مثل هؤلاء".

ففيه اللي يتاجر بالمظاهر الدينية، وللأسف الموضوع دا ظهر
زمان في فترة في تاريخ الكنيسة وكان اسمه السيمونية.
قلت: وإيه السيمونية دي يا أبونا!!

قال: السيمونية نسبة لسيمون الساحر. ولتخيل حواراه مع
بطرس الرسول

سيمون (بجث ودهاء): بص يا معلمنا بطرس. انا عندى طلب!؟

بطرس الرسول: اتفضل يا سيمون!!
سيمون (بجث): أنا معايا فلوس كتير. كتير قوى. وكمان معايا ذهب وفضة كتير. وأنا عاوز اخدم ربنا.
بطرس الرسول: يعنى إيه المطلوب يا سيمون عاوز إيه!!
سيمون : عاوز اخد موهبة الروح القدس. بس مش زى باقى الناس!!

بطرس الرسول: آمال إيه يا سيمون!!
سيمون: أبقى زى الرسل. يعنى اللى أحط عليه إيدى يأخذ الروح القدس زى ما الرسل بيعملوا. وأنا هادفع ذهب كتير وفضة كتير قوى. تستخدموها فى الخدمة وتدوها للفقراء.
بطرس الرسول (بقوة): لا لا يا سيمون خلى دهبك وفضك معاك للهلاك. مواهب الروح القدس مش بالفلوس ولا بالذهب والفضة. توب يا سيمون لأنك كدا فى طريق الهلاك ولسه عايش عبد لابليس وللمجد الباطل.

قلت: طيب دى قصة سيمون لكن إيه هي السيمونية!!

قال: دا حصل في فترة من تاريخ الكنيسة كان فيه بعض الناس بيتقوا عاوزين يأخدوا الكهنوت وكانوا بيدفعوا فلوس علشان كدا. فاللى بيعمل كدا دا مش غرضه خدمة المسيح لكن غرضه المجد الباطل والتسلط على الناس.

قلت: دا أكيد نصيبه هايكون مع سيمون الساحر حتى لو بيعمل معجزات!!!

قال: طبعا كل اللي يأخذ موهبة ويستخدمها في المجد الباطل أو في التسلط على الناس ومش في مجد المسيح، دا هايكون نصيبه مع سيمون الساحر.

قلت: بس الناس دول كدا أكيد كانوا بيكونوا عشرة للشعب ويخلوا الناس يضيعوا أو يلحدوا!!

قال: زى ما اتعلمنا إن ما يكونش سلامنا في شخص، فمش علشان حد أخذ موهبة الكهنوت بالفلوس زى سيمون يعثرنا ونضيع معاه. اللي يضيع يضيع لوحده، إحنا سلامنا في المسيح يا ابني مش في أشخاص. فاللى بيعمل كدا بيتقول عليهم بطرس الرسول "وهم في الطمع يتجرون بكم بأقوال مصنعة الذين دينونتهم منذ القديم لا تتوانى وهلاكهم لا ينعس" (٢ بط ٢ : ٣).

واللى بيسب عثرة للناس بيكون وضعه صعب جدا قال عليه
الرب يسوع "لا يمكن إلا أن تأتي العثرات ولكن ويل للذي تأتي
بواسطته خير له لو طوق عنقه بحجر رحى وطرح في البحر من أن
يعثر احد هؤلاء الصغار" (مت ١٧ : ١).

فالمواهب مش هي القداسة. ففيه اللي عنده موهبة الوعظ
وممكن يوعظ بكلام رائع وكثير من الناس تصدق وتطبق الكلام
ويخلصوا، والواعظ نفسه لو ما عيش بحسب اللي بيقوله يهلك.
قلت: فعلا فيه كثير زى كدا يا أبى.

قال: لو شخص عنده موهبة الترانيم فيرنم ويقول ألحان وكثير
يتوبوا بسببه وهو ممكن يتعاجب بصوته وينشغل بموهبته وفي النهاية
الناس تخلص وهو يهلك.

قلت: موضوع صعب وخطير. لكن إيه هو مفهوم القداسة
الحقيقي؟!

قال: كلمة قديس أو مقدس تعنى مخصص. فنقول الكنيسة
مقدسة يعنى مخصصة للصلاة ما نلعبش فيها كورة.

قلت: ما ينفعش طبعاً!!

قال: وأواني المذبح مقدسة يعني مخصصة للتناول مش ممكن نأكل فيها.

قلت: ما يصحش طبعاً!!

قال: فأنت مقدس وقديس يعني مخصص لسكنى الله في داخلك. فكل شخص مسيحي هو قديس لأن روح الله القدوس يسكن فيه. والقداسة مش بس للرهبان والمتوحدين دا شباب عاديين زى شهداء ليبيا كان جواهرم حب للمسيح أكثر من رهبان وكهنة كتير، فالقداسة مش بالشكل ولا بالرتبة لكن بحب المسيح.

قلت: تمام كل شخص مسيحي قديس لأن روح الله يسكن فيه. لكن ولو كنت بأسقط في خطية يا أبونا هل أكون برضه قديس؟

قال: دى تالت حاجة بتخلينا مانقتنعش إننا قديسين وهى:

مفهومنا الخاطئ عن القداسة.

فالشياطين ها يحاولوا يوصلوا ليك إنك علشان تكون قديس لازم تكون بلاخطية. ولتخيل حوارهم مع بعض.

الشیطان ١: عاوزين نكمل خطتنا علشان نروح لكبير

الانجاس!!

الشیطان ۲: کدا مش فاضل لینا غیر الورقة الأخيرة علشان
نقنعه إنه مش قديس!!

الشیطان ۱: إيه الورقة دی أنا نسيت یا نجس!! دا واعی قوى
أنا قربت أیأس!!

الشیطان ۲: عیب یا نجس ما تقولش کدا إحنا مش بنیأس ابدًا!!
الورقة الأخيرة إننا نقنعه إنه علشان یبقى قديس لازم یكون بلا
خطیة!!

الشیطان ۱: هو فیہ حد بلا خطیة!! غیر الله!! دا لو اقتنع بکدا
یبقى غبی قوى!!

الشیطان ۲: ترکیزنا هایكون على غباء البشر!! فلما یبقوا جهلة
بالکتاب المقدس نقدر نخدعهم ونضعهم!!

الشیطان ۱: یعنی هانعمل إیه!! فهمنی یا نجس!! لحسن باين
على اتعلمت الغباء من البشر!!

الشیطان ۲: بعد ما نقنعه إن القديس لازم یكون بلاخطیة، نبدأ
نحاربه بخطیة واحدة ونركز علیها وكل ما یقع فیها نقولوا أنت
طبیعتک الخطیة ونفضل نحارب فیہ لحد ما بیأس ویستسلم وینسى
موضوع إنه قديس دا خالص.

الشیطان ١: دى لعبتی!! أنا عارف هاركزلوا على إيه!! أنا

تغطا الشیاطین جدا ممن
یمارسون الفضائل عن
فهم. لأن الشیاطین تريد أن
تصوب سهامها خفية نحو
الاستقامة التي فی القلب.
ق. یوحنا فم الذهب
(الشیطان ونصرتنا علیه
ص ١٤١)

هافضل وراه لحد ما عقدوا من
عیشته!!

الشیطان ٢: تمام یا نجس!! إلى
عملنا النجس!!

الشیطان ١: إلى عملنا النجس!!
قال: وللأسف فيه ناس كثير
بتتخدع بكدا وتفتكر إني علشان
أكون قدیس بيقى هاكون بلا خطية.

قلت: ساحنى یا أبونا. دا اللي أنا فاهمه عن القداسة وأفتكر أن
كثير يفتكروا كدا برضه!!

قال: طيب فيه سؤال یا ابني. هل فيه شخص مهما إن كان
يقدر في أي يوم يقول إنه بلا خطية تماما!!

قلت: طبعا. لا!! لكن القدیس ممكن بيعمل خطايا قليلة نوعا

ما.

قال: طيب إيه هو مقياس النوع ما!! يعني كم خطية بعدها
يقدر يقول الواحد إنه مش قديس!! دا الكتاب المقدس بيقول "من
قال لأخيه يا أحمق صار مستوجب نار جهنم".

قلت: الموضوع صعب ومحير!! لكن إيه هو مفهوم القداسة؟!

قال: القداسة مش إني مش بأعمل الخطية ابدأ!!

قلت: أكيد ما فيش حد معصوم من الخطأ!!

قال: لكن القداسة إني أكون مش عاوز الخطية ومش طايقها.
بيقول ماراسحق " النفس الفاضلة لا تلقى قبولاً عند الله بسبب
الأعمال ولكن من أجل الإرادة الفاضلة التي تتجه إليه والقلب المُفعم
دائماً بالإنسحاق".

زى شخص نضيف ماشى في شارع ملوث بالقاذورات، فلما
تيجى عليه القاذورات يتضايق جدا ويرجع بسرعة للبيت ويغير
لبسه. فكل ما الواحد يكون رافض للخطية ويعد عنها ولو سقط
بيتوب بسرعة، فدا المؤشر إنه بينمو في حياة القداسة، علشان كدا
الكتاب بيقول "الصديق يسقط سبع مرات ويقوم" (ام ٢٤ : ١٦).
فبالرغم من إنه يسقط سبع مرات لكن الكتاب بيقول عليه
قديس مش زنديق.

قلت: مفاهيم القداسة الغلط دى ضيعت شباب كثير، يفتكروا
علشان هم بيسقطوا، بيقى كدا فقدوا قداستهم وبقوا انجاس.
فاستسلموا للخطية وتعايشوا مع الشر.

قال: كلنا ضعفاء وبنسقط في خطايا يا ابني لكن المهم إننا
نرفض الخطية ونبعد عنها ولو حصل وسقطنا نتوب. طيب هو إحنا
بنتوب ليه!!

قلت: بنتوب ليه!!

قال: بنتوب علشان طبيعتنا القداسة والخطية ضد طبيعتنا فلما
بنخطئ بتوب ونقول سامحني يارب أنا أخطيت وأقبل الغفران
وأتطهر من الخطية، مش على العمال والبطال، وليل ونهار الواحد
يقول "اللهم ارحمني انا الخاطيء".

قلت: يعنى ما نقولش كدا يا ابونا!!

قال: نقول كدا لما نسقط في خطية معينة نقول "الله ارحمني
على الخطية الفلانية". لكن مش ليل ونهار نعيد ونزيد من غير فهم
ولا تركيز "اللهم ارحمني انا الخاطيء".

قال: فلما حد يتوب ويقول "اللهم ارحمني انا الخاطيء" الله يقول

له

- رحمتك يا ابني. صدق إني رحمتك.

-اللهم ارحمني أنا الخاطئ. اللهم ارحمني أنا الخاطئ

- رحمتك يا ابني. رحمتك يا حبيبي. صدق صدق إني رحمتك.

- اللهم ارحمني انا الخاطئ. اللهم ارحمني أنا الخاطئ. اللهم

ارحمني أنا الخاطئ.

- يا حبيبي رحمتك. صدق إن غفرت لك من أول مرة. ما

عندكش حاجة تانية تتطلبها. مافيش باركني مافيش املئني بالروح

القدس مافيش استخدمني في الخدمة!!

قال: فضرورى نصدق إن الله لما بنطلب الغفران والرحمة

بنأخذهم، مش نكرر الكلمة من غير فهم لحد ما نصدق إحنا خطاة

وطبيعتنا الخطية ونضيع بسبب عدم فهمنا. كمان فيه خدعة كبيرة

بيستخدمها إبليس وبيتعب بيها ناس كتير وبيخليهم مش عارفين

يقبلوا هبة القداسة اللى إداها ليهم المسيح مجاناً.

قلت: إيه الخدعة دى يا أبونا؟!

قال: الخدعة هي:

الصورة المعكوسة.

قلت: الصورة المعكوسة!! يعنى إيه الصورة العكوسة يا أبونا!!

قال: الصورة المعكوسة هي إننا لازم نعمل أعمال كويسة
ومحترمة علشان نستحق نكون قديسين. لكننا بنحاول ومش بنقدر،
وبكدا بنفضل تعبانين وحاسين إن القداسة مستحيلة!!

قلت: طيب إيه الصح يا أبونا!!

قال: الصح إننا نصدق في الأول إن الله قدسنا بسكنى روحه
جوانا وإن طبيعتنا بقيت طبيعة القداسة، ودا هو اللي هايجلينا نقدر
نعيش قديسين مش العكس.

قلت: مش المفروض أكون كويس وماعملش حاجات غلط
علشان أستحق أكون قديس!!

قال: لا مش كدا يا حبيبي. دا مستحيل!!

قلت: الصراحة هو مستحيل يا أبونا. فأنا حاولت كتير
وفشلت. وبقيت حاسس إن الموضوع مستحيل!! علشان كدا
يأست واستسلمت للخطية سنين طويلة!! لكن إيه الحل يا أبونا!!

قال: نقول تاني، الحل إنك تصدق إنك بقيت قديس بسكنى
روح الله جواك، ولو صدقت كدا دا هايساعدك إنك تجاهد وتعمل
أعمال القديسين، لكن العكس مستحيل!! وهنا الشياطين ها
تجاربك وتخطط مع بعضها وتقول:

شيطان ١ وشيطان ٢ : إلقنا يا كبير الانجاس!! إلقنا يا كبير
الانجاس!!

الشيطان الكبير (يتفزع): مالكم مرعوبين ليه كدا يا أنجاس.
فزعتوني!!

الشيطان الصغير ١ و ٢: مشيل هايضيع مننا!! مشيل هايضيع
مننا!!

الشيطان الكبير: إزاي يا أنجاس!! إيه الجديد!!!
الشيطان الصغير ٢: مشيل بدأ يصدق إنه قديس وإن جواه روح
الله القدوس وبدأ يبعد عننا ويمشى في طريق القداسة!!!
الشيطان الكبير (باستغراب): إيه اللي حصل له!! إمال فين كل
أفكار الاحتقار وإنه خاطئ ونجس اللي بنخلى أهله والخدام
بيقولوهولوا من سنين طويلة!!

الشيطان ١ (بحزن): للأسف بدأ يصدق كلام الانجيل ونسى
كلام الاحتقار بنخليه يسمعه!! إلقنا يا كبير الأنجاس!!
الشيطان ٢: إلقنا لحسن هايضيع مننا!! يا كبير الانجاس!!
الشيطان الكبير: تعالوا يا أنجاس!! هأقولكم تعملوا إيه!!
شيطان ١ و ٢: قول يا كبير الانجاس!!!

الشیطان الكبير: إعكسوا الصورة يا أنجاس!!

شیطان ٢: نعكسها إزای!!

قاوموا الشيطان واجتهدوا

أن تعرفوا خداعاته، فقد

اعتاد أن يخفى المرارة

وراء مظهر العذوبة حتى

لا تتكشف، مقدما أوهاما

تبدو لناظريها جميلة غير

أن حقيقتها تختلف عن

مظهرها، هذا كله يفعله

لكي يخدع القلوب بدهائه

المتشبه بالحق وله جاذبيته

ق. يوحنا فم الذهب

(الشیطان ونصرتنا عليه

ص ١٤٢)

الشیطان الكبير: یعنی بدل ما

يصدق إنه قديس فيعمل أعمال

القديسين. نقنعه إنه ضرورى في الأول

يعمل أعمال القديسين علشان يستحق

إنه يبقى قديس!!

الشیطان ١: طيب وإيه الفرق يا

كبير الأنجاس!!

الشیطان الكبير: طول عمرك غيى يا

نجس!! ركز معايا!! هو لو صدق إنه

بقى قديس هايجاهد إنه يعمل أعمال القديسين وهايقدر ويتعبنا

معا. لكن إحنا نقنعه إنه ضرورى يعمل أعمال كويسة في الأول

علشان يستحق إنه يكون قديس!!

الشیطان ١: نقنعه إنه يعمل أعمال كويسة!! معقولة!!

الشیطان الكبير: ركز يا نجس!! دا في الأول لكنه هو مهما

يجاول لوحده مش هايقدر. فمع الوقت هايأس ويجس إنه ما

يستحقش إنه يكون قديس!! وبكدا ينسى موضوع إنه قديس
وبكدا نقدر نتحكم فيه!! فهمت يا نجس!!

الشياطين الصغيرين(يضحكوا): فهما يا كبير الانجاس-خطة
شيطانية هايلة!!

قلت: أفكار شيطانية خبيثة. شكلها من برا كويس لكنها
مدمرة!! ضيعتني سنين طويلة!! وللأسف لسه مضيعة ناس كثير!!
قال: فهما الواحد يجاهد علشان يبقى قديس بأعماله مش
هايقدر ابداء.

قلت: مستحيل!!

قال: لكن في الأول ضرورى تصدق إنك بقيت قديس بسكنى
روح الله جواك هو دا اللى يخليك تعيش قديس وترفض الخطية
وتجاهد ضدها، فاحذر يا ابنى من الصورة المعكوسة!!

قلت: الصورة المعكوسة دى ضيعت ناس كثير!!

قال: وفيه فكرة مدمرة لحياة القداسة خد بالك منها يا ابنى!!

قلت: إيه هي يا ابونا!!

قال: إن الواحد يأجل التوبة أو لما يتوب ما يثقب في الغفران
غير آخر الأسبوع أو آخر الشهر فيفتكر إنه قديس بس يوم تناول
أو الاعتراف وباقي الشهر بيتقى خاطئ ونجس!!

قلت: إيه يا أبونا أنت بتقرأ أفكارى أنا فعلا بأفكر كدا!!
قال: لا يا ابني خد بالك فالفكرة مدمرة ناس كتير!! إحنا
قدسين كل الأيام، مش يوم في الأسبوع ولا يوم في الشهر، ولو
ضعفنا نتوب ونطهر بدم المسيح وثق في الغفران الكامل والفورى
مش آخر الأسبوع ولا آخر الشهر، ففي الوقت اللى بتوب فيه

لا ندع اليأس يتملكنا إذ لنا
حوافز كثيرة فى رجاء
صالح حتى وان أخطأنا كل
يوم، فلنقترب إليه متوسلين
متضرعين طالبين المغفرة
من خطايانا .

ق. يوحنا فم الذهب
(الشیطان ونصرتنا عليه
ص ١٤١)

وتقول أخطأت الله ها يأحدك على
طول في حضنه ويقول لك
"مغفور ليك كل خطاياك يا
حبیبى. مغفور ليك كل خطاياك يا
حبیبى".

قلت: معلش يا ابونا ليه قدسك
مركز على موضوع الغفران دا في كل
مرة بنتقابل فيها!!

قال: لأن حرب إبليس الأساسية ضدنا هي الخطية، وسلاحنا

الاساسى اللى نقاومه بيه هو الغفران.

قلت: فعلا اهم سلاح. هو سلاح

الغفران. بيخلى الواحد يحس إنه حر!!

قال: فالفكر اللى بيمنع عنك

الغفران أو اللى بيشكك فيه دا من

إبليس مش من الله، زى ما يكون

جندى بيحارب فى جيش والقائد

بيأخذ منه السلاح ويقوله:

قائد(بكبرياء وعجرفة): السلاح

هايقى معايا وتيجى تأخده آخر كل

شهر أو كل أسبوع على حسب

الظروف!!

جندى(بتوسل): يا قائد، العدو بيحاربنى فى كل ساعة!! دا

بيحاربنى فى كل دقيقة!! هاحارب إزاي وانا مش معايا سلاح!!

قائد(بجزم وشخط): أنت بتعترض!! السلاح هايكون معايا

وكفاية تأخده مرة فى الشهر!! أنا القائد!!

فانظروا أحشاء رحمة الله
و طول أناته من نحونا و

هو منتظر رجوعنا،

وحينما نخطئ فهو يمد يده،

فى انتظار توبتنا. حينما

نسقط، لا يستحى أو يخجل

من قبولنا و احتضاننا

ثانية. فلنكن فقط صاحين

متيقظين، و لنا نية سالحة

أكيدة، و لنتحول حالا

باستقامة ونطلب منه

المعونة و هو مستعد أن

يخلصنا

ق. أنبا مقار الكبير

(عظات القديس مقاريوس

ص ٦٠)

جندى (بجدية): أنت القائد وليك احترامك. بس أنا مش
هاقدر أحارب وانا مش معايا سلاح!! كدا هاتهمزم وممكن أموت!!
القائد (بغضب وشخط): أنت بتفلسف كتير ودا مش حلو
عليك!! ما تعترضش لحسن هاعزلك من الجيش!! حارب وآخر
الشهر تيجى تأخذ السلاح مفهوم!!

جندى: خلاص طالما السلاح هايبقى معاك خليك معايا طول
الوقت وما تسبنيش ولا لحظة!!

القائد: هو أنا فاضى!! وهأكون مع مين ولا مين!! أنا القائد!!
جندى (بيكلم نفسه): إيه دا!! إيه اللي حصل للقائد!! شكل
جاله جنون العظمة!!

جندى ٢: مالك يا مينا قاعد حزين ليه!!

جندى ١: شفت القائد بيقول إيه!!!

جندى ٢: بيقول إيه!!

جندى ١: بيقول إن السلاح هايكون معاه مش هايديهولنا غير

آخر الشهر!! طيب هانحارب إزاي!!

جندى ٢: دا عمل مع الكتيبة كلها كدا!! مش عارف إيه اللي

حصله في مخه!!

جندى ١: باين عليه بقى عنده جنون العظمة!! عاوز يضيعنا

كلنا!!

قال: تفتكر دا قائد حقيقى مهتم بالجنود بتاعته!!

قلت: كدا مش قائد ابداء!! ممكن يبقى عميل او قائد مجنون!!

مافيش حل تانى!! القائد الحقيقى بيشجع جنوده ويقولهم السلاح

معاكم دايما وتيجوا تأخذوا المعونة والإرشاد لما تحتاجوا.

قال: وتفتكر الجندى هايعمل إيه!!

قلت: يا يستسلم!! يا يقتل القائد ويخلص منه!!

قال: ودا السبب الرئيسى إن فيه شباب كثير مستسلمين

للخطية وعاشين فيها، علشان مش واثقين إهم لما بيتوبوا ويقولوا

"يارب سامحنا" الله بيغفر لهم!! فيقولوا

- "كدا كدا ضايعين!! وطول الوقت نجسين!! عيش حياتك

وفي الاخر كله رايح جهنم!!

فسلاحك علشان تحافظ على القداسة بتاعتك هو التوبة الدائمة

وثقة الغفران الفوري والكامل.

" أه يارب يسوع عشنا وقت طويل محرومين من حبك

ونعمتك!! عشنا كثير في شعور الذنب والخطية ونفتكر إن طبيعتنا

هي الخطية مش القداسة!! كل دا بسبب جهلنا بالكتاب المقدس جهلنا بحبك جهلنا بغفرانك. علمنى يارب وعلمنى كل ولادك إن القداسة انت بتدهلنا مجاناً وإحنا بنأخذها ونمو فيها وإن القداسة مش هي المعجزات وأن الواحد ايديه تنور لكن القداسة ان روحك سكنى فينا. خلينا نصدق إننا قديسين كل يوم مش يوم في الشهر، كل حياتنا إحنا قديسين ولو غلطنا خلينا نتوب ونرجع لحضنك فتطهرنا من كل خطية وتشفينا من كل ضعف. يارب يسوع يا احن واعظم أب".

قال: رحمت فين يا ابني!!

قلت: ساعحنى يا أبى سرحت شوية!! الصراحة الكلام جديد وخطير!! لكن معلىش يا أبى فيه سؤال. مش ممكن كلمة قديس تخلىنى أتحارب بالكبرياء!!

قال: زى ماقلنا كتير قبل كدا فيه فرق بين الحرب بالخطية والسقوط في الخطية!! فمش معنى إنك اتحاربت بأفكار الزنا فبكدا تكون سقطت في الزنا، ولا لأنك اتحاربت بالإلحاد بكدا تكون ملحد، وزى كدا مش معنى إنك اتحاربت بالكبرياء بكدا تكون بقيت متكبر.

قلت: وإمتى يكون الفكر خطية؟

قال: زى ما قال القديس مرقس الناسك، لما تقبل الفكر وتفرح بيه وتكمل معاه في طريق الشر، لكن لما يبجيلك أى فكر وتجاهد ضده وترفضه فبكدا بتكون مجاهد ولك إكليل. أما كلمة قديس فما تقلش منها فهى مش هاتجيب لك كبرياء.

قال: تمام يا أبونا. هأرفض الفكر لكن عاوز اعرف ليه كلمة قديس مش هاتجيب لى كبرياء؟! قال: علشان ثلاثة أسباب:

أول سبب لأنك أخذت القداسة مجاناً.

مكتوب. "لأنكم بالنعمة مخلصون بالإيمان وذلك ليس منكم هو عطية الله. ليس من أعمال كي لا يفتخر أحد". (أف ٢: ٨) فأنت مالکش فضل في إنك بقيت قديس. فمش بأعمالك بقيت قديس ولكن بسكنى روح الله جواك، ودى هبة ونعمة من الله لينا. فاللى بيأخذ حاجة كبيرة مجاناً وهو ما يستحقهاش دا مش ممكن يتكبر ابداً.

قلت: مش ممكن طبعا.

قال: فواحد زى بولس الرسول أخذ نعمة كبيرة فلو سألتناه
وقلنا له

- يا معلمنا بولس أنت قديس عظيم!! انت أخذت نعمة كبيرة
قوى!!

- دى نعمة ربنا لى أنا الضعيف!!
- ضعيف إزاي دا انت بشرت في أماكن كثير وغيرت أمم
وشعوب كثير!!

- أنا خربت كنائس واضطهدت مؤمنين كثير وعذبتهم لكن
ربنا افتقدني وغيرني فاللى انا فيه دى نعمة ما استحقهاش!!
- بس أنت دلوقتي حد عظيم قوى يا معلمنا بولس!!

- دى نعمة يا ابني. نعمة يا ابني. نعمة أنا ما أستهلهاش!!
قال: فكل ما الواحد الله يديله نعمة أكثر بيكون عند اتضاع
أكثر. اما السبب التاني اللى ما يخليكش تتكبر هو إنك مش وحدك
القديس. فكل الناس قديسين بسكنى روح الله جواهرهم.

قلت: حتى غير المؤمنين قديسين!؟

قال: غير المؤمنين عندهم إمكانية القداسة لو آمنوا وقبلوا سكنى
روح الله جواهرهم. فمافيش داعي للتفاخر والكبرياء بإنك قديس،

فكلنا متساويين في إمكانية قبول النعمة. فهل ممكن أخ يتكبر على إخوته بسبب إنه من عيلة عريقة!!! ويقول
شخص (بكبرياء وعجرفة): أنا من عيلة عريقة. أنا احسن واحد في البلد!!

شخص: طيب ما البلد كلها من نفس العيلة!!
شخص(بكبرياء): ممكن هم برضه من نفس العيلة!! لكن فيه فرق!! أنا اتعلمت أحسن تعليم!! وعندى ثروة كبير غير باقى الناس الصعاليك!!

شخص: بس الناس دول أهلك وإخوتك!! إزاي تحتقرهم وتقول عليهم صعاليك!!
شخص(بكبرياء): مش كبرياء ولا حاجة!! دا الطبيعي!! فيه فرق كبير بينى وبينهم!!

قال: لو حد قال كدا تقول عليه إيه يا ابني!!
قلت: طبعا شخص ما عندهوش أصل. هو فيه حد بيتكبر على إخوته!! لكن مش ممكن حد علشان إنه اتغير فعلا وبقي كويس يجيله كبرياء؟

قال: ودى النقطة الثالثة وهى مؤشر مهم أن القداسة حقيقية
ومش مزيفة.

قلت: وإيه هو المؤشر دا؟!!

قال: **الاتضاع**. فالدليل إن الواحد ينمو فى القداسة إنه ينمو
فى الاتضاع، أما اللى يتكبر فدا أكبر دليل أنه مش بيعيش القداسة
الحقيقية، فكل ما الواحد ينمو الإنسان فى القداسة بيكون شبه الرب
يسوع أكثر، والرب يسوع كان كلى الاتضاع والوداعة وهو قال
"تعلموا منى لأني وديع ومتواضع القلب" (مت ١١ : ٢٩).

فدليل القداسة الحقيقية هو النمو فى الاتضاع مش فى الكبرياء.
قلت: الكلام سهل يا أبونا لكن إيه الخطوات علشان أعيش
القداسة بجد وماتكونش مجرد كلمة بأفرح بيها!!
قال: علشان تعيش حياة القداسة محتاج ثلاثة أمور:

فى الأول ضرورى تصدق إنك قديس.

. فزى ما قلنا بداية التغيير هي فى الدهن، فلو إتغير الدهن
هايتغير السلوك. فاللى مش هايصدق إن قديس علشان الروح
القدس سكن فيه، دا مستحيل يعمل أعمال القديسين مهما إن
حاول.

قلت: تمام. البداية علشان أعمل أعمال القديسين أنى أصدق
إنى قديس. وإيه تانى حاجة؟!

قال: تانى حاجة علشان تعمل أعمال القديسين:

أنك تفرح بآنك قديس.

فلو فيه شخص فاز بجائزة مليون دولار إيه هايكون رد فعله؟!

قلت: هايطير من الفرح!!

قال: لكن لو الشخص دا بعدما أخذ الجائزة كان حزين

وكئيب!! تقول عليه إيه!!

قلت: بالتأكيد يا إما أن الجائزة وهمية يا إما هو شخص أبله أو

مجنون!!

قال: كل اللي مش بيفرح بالنعمة العظيمة اللي اخدها، اللي

هي سكنى روح الله فيه واللى ما تتقدرش بمليارات الدنيا كلها،

فهو يا إما مش مصدق يا إما أبله ومجنون، وفي الحالتين مش

هايستفيد من نعمة سكنى روح الله جواه.

قلت: "مش وش نعمة".

قال: فدليل إننا قديسين هو أن نفرح ونفتخر بكدا، فدا

هايديك قوة في مواجهة حروب النجاسة والخطية فمكتوب "فرح

الرب يكون قوتكم" (نح ٨: ١٠). لكن اللي يعيش تعيش وحزين
ومش بيفرح ولا بيفتخر بأنه قديس دا بسهولة يسقط قدام حروب
إبليس النجسة.

قلت: سامحنى يا أبونا قدسك بتقول يفتخر؟! هل أفتخر بأنى
قديس؟!

قال: دا مش كلامى لكن كلام الكتاب المقدس مكتوب "من
افتخر فليفتخر بالرب" (١ كو ١ : ٣١).

فإحنا مش بنفتخر بأعمالنا ولا بجهادنا لكن بالرب، وبسكناه
فينا، وبأبوتة لينا، هو دا سبب افتخارنا، كما إننا مش بنفتخر على
إخوتنا لأن كلنا لينا أب واحد وهو الله، وكلنا سكن فينا روح
واحد هو الروح القدس، لكن بتفتخر وانت في حربك مع إبليس
ومع أفكاره النجسة.

قلت: كلام رائع يا أبونا هاأصدق وأفرح إنى قديس لكن هل
دا كافي علشان أعيش قديس؟!

قال: دى النقطة الثالثة. علشان تعيش قديس وهى:

أنك تعمل أعمال القديسين.

ودا اللي اتكلمنا عليه بالتفصيل في كل المنهج بتاعنا، إنك ضرورى تتغذى بغذاء القديسين اللي هو كلمة الله، وتحفظ حواسك مقدسة وجسدك طاهر ويكون أصدقائك من القديسين، وتتواجد في أماكن القديسين. وتكرز وتساعد ابوك السماوى في وصول كلمة الخلاص لاختواتك في كل العالم علشان يقبلوا الخلاص ويكونوا قديسين.

قلت: لكن الموضوع مش بالسهولة دى يا ابونا؟

قال: الموضوع سهل لو صدقت إنك قديس، ولو لقيت صعوبات مش هاتشعر بيها علشان الهدف السامى اللي بتعيش له والاجهاد هايكون مفرح لان معاك الروح القدس.

قلت: قدسك وعدتنى بمفاجأة إيه هي يا ابونا!!

قال: المفاجأة هي أن الكلام اللي قولناه النهاردة موجود في قرار المجمع المقدس لسنة ٢٠١٨ بيقول فيه

"مفهوم القداسة: يعلن الكتاب المقدس وتقليد الآباء والليتورجيا أن جميع المسيحيين قديسون بسبب سكنى الروح القدس فينا بالعمودية والميرون والاتحاد بالمسيح في الافخارستيا".

قلت: مفاجأة رائعة يا أبونا. علشان ماحدث يتشكك في الكلام
وكل الناس يصدقوا وما يفتكروش إن قدسك بتقول كلام غريب.
قال: نلخص اللي قلنا النهاردة قلنا إننا قديسين علشان ثلاث
أسباب إيه هم؟!

قلت: لأننا أبناء الله القدوس وبيسكن فينا الروح القدس وإحنا
صورة المسيح القدوس.

قال: وفيه ثلاثة معطلات بتخلينا ما نصدقش إننا قديسين.
هم!!

قلت: حروب الشياطين. وإن القداسة هي عمل المعجزات.
وإن القداسة إني أكون بلا خطية.

قال: وفيه ثلاث حاجات تساعدنا نعيش قديسين؟!
قلت: أول حاجة إننا نصدق إننا قديسين وتاني حاجة نفرح
بإننا قديسين أما تالت حاجة إننا نعمل اعمال القديسين.

قال: وخذ بالك يا ابني من الصورة المعكوسة. ومن تأجيل
التوبة أو تأجيل عدم الثقة في الغفران.

قلت: ربنا يحمينا يا أبونا من الصورة المعكوسة. صلواتك يا
ابونا استأذن قدسك.

قال: صلوات العدرا وكل القديسين. ربنا معك يا ابني.
للحصول على باقى الأجزاء PDF مجاناً من خلال هذا الموقع:

Website: mbadez.com

أو لسماع الحلقات صوت

<https://soundcloud.com/mbadez>

أو من تطبيق الأندرويد "مبادئ الحياة الروحية"